

欽定剿平捻匪方略

欽定剿平捻匪方略卷二百七十九 丁卯年

五月二十三日

乙亥

曾國藩奏言任賴逆股現已

東趨山東防務以運河爲最要本年天氣亢旱
運河日涸水師無可展施陸軍尙嫌單薄賊如
悉數猛撲恐上年之濬河修牆前功盡棄至陝
西張逆一股屢經劉松山擊敗逆焰漸衰聞有

回竄出關之意如又竄至豫鄂應請

旨飭下李鴻章仍檄劉松山追賊東還不宜久留秦
中一則道途太遠糧餉難運一則該軍與捻逆
接仗已多深悉賊中伎倆應令各軍全力合謀
先保中原腹地

同日李鴻章奏言據探捻逆狂竄東境由鄆城
梁山東北戴廟突過運河臣憤懣憂惶莫知所
措從前僧格林沁督師時運河未經設防捻衆

往來自若官軍馬隊甚多尙可隨時馳逐迨曾
國藩接辦因湘淮各勇募自南方素無騎隊乃
議於運河東岸沿隄興築長牆嚴堵竄越濟甯
以上責令東軍分守臺莊以下責令清淮各軍
分守其濟甯南至臺莊一段向以湘軍水師淮
軍陸師補其闕兩年以來捻逆屢次猛撲未能
竄過臣接任勦匪任賴等股遠竄鄂中臣不得

不率全師赴援去冬卽與閻敬銘緘商以東境
運防自黃河以南周家口戴廟至濟甯石佛趙
村共不過二百里有運河可阻有長牆可扼東
省財賦較可贍軍應專任本省運防而騰出前
駐濟甯之潘鼎新張桂芳淮軍作爲游擊之師
兼顧他省各督撫自守汛地俾臣得專力援剿
庶免處處牽掣閻敬銘復函頗以爲然卽丁寶

楨亦稱濟甯新店以上由東軍認守臣方慮徐

道奎所紮南陽湖一帶水涸易渡不料賊匪直

撲鄆北之戴廟該處東軍水陸兵力尙厚竟不

能爲一日之守廢弛貽誤誠可痛惜臣方檄調

劉銘傳潘鼎新周盛波王永勝沈宏富董鳳高

各軍分赴曹單豐徐舊河隄聯絡扼紮並密商

豫軍進紮蘭考皖軍進屯蕭碭同時興工圈築

冀蹙賊於黃運之間就地勢以圖圍困潘鼎新
劉銘傳於五月十二三等日馳抵單縣諸軍未
集賊入東甬四日而卽撲河未半日而卽搶渡
機會頓失局勢大非查賊旣過河東而濟泰登
萊南而兗沂海贛儘可任意流竄潘鼎新劉銘
傳已拔隊過河追剿惟張秋濼口二鎮尤係北
竄要津渡口船隻較多該撫當有防備臣深爲

懸繫拜摺後卽由周家口啟行先赴歸德察度
賊情相機進止一面提催各軍就近調派合無
仰懇

聖恩飭催直隸督臣於張秋以東黃河北岸迅速擇

要嚴防以杜該逆乘虛窺竄

李鴻章又奏言劉松山等軍勦辦西路捻匪於
四月初六至二十四等日連獲大勝斃賊三千

餘名二十七日各軍由灞橋追至新底鎮詎該
逆因潼關有備不敢東竄折沿渭河西趨五月
初一日又敗之鄠縣少義坊小有斬擒遂由鰲
屋橫出郭公祠竄渡渭北蒲溪鎮桑家莊一帶
初三日該軍亦由塔耳寺過河抵張家村賊以
大股來撲督勇擊退遁回原處查該逆屢經痛
剿奔竄渭河南北窺晉不遂回豫未能賊勢日

窮趨向難定已令劉松山會商各軍相機追剿
設法殄除勿任該匪得再逞志均奏入

上命軍機大臣傳諭曾國藩李鴻章左宗棠庫克吉
泰劉長佑崇厚喬松年丁寶楨曰張總愚股匪屢
爲劉松山等軍痛剿悍賊死傷甚多又截其東竄
出關之路該逆現復渡渭北遁自應乘其衰弱爲
就地殲除之計左宗棠現在督軍分兩路入關著

卽與陝省兵勇夾擊兜圍迅將此股在陝殄盡免
至流入鄂豫儻有餘匪竄出關中著庫克吉泰喬
松年飭劉松山跟蹤緊追毋稍鬆勁李鴻章一面
分派鄂豫諸軍扼要堵擊勿任與任賴等逆合併
至任賴等股現已竄至東省搶過運河攻陷隄牆
在防將士不能爲一日之守致誤大局實堪痛恨
現在賊蹤已由泰安逼近濟南有東擾登萊青之

勢李鴻章當懷遵前諭迅飭劉銘傳潘鼎新等軍
速赴濟泰等處與東省各軍合力勦辦毋再延誤
張秋齊河等處河防劉長佑丁寶楨均當懷遵前
諭嚴密堵禦其齊河以東至利津沿河北岸一帶
著劉長佑崇厚迅速籌撥直軍出境堵扼丁寶楨
嚴檄武定各屬地方官激勵團練分段助守南岸
地方亦當迅籌防堵以固河防鹽河船隻速行提

歸北岸以杜賊匪搶渡登萊三面距海賊如竄至
自可厚集兵力步步進逼就地殄滅李鴻章現雖
移紮歸德著再擇要就近調度毋諉爲賊蹤飄忽
漫無籌畫自干罪戾淮徐一帶著曾國藩嚴密堵
禦以防南竄

曾國藩又奏言臣查蒙亳等處本係捻匪老巢
從前募民投入捻中則可出可歸投入營中則

時降時叛淆亂黑白莫此爲甚前年查辦之初
不得不濟之以猛使人知在外充捻者無可容
之鄉里無可居之室廬即使混跡軍營藏身自
固亦必立置重典不稍姑容迨匪黨知所畏憚
民賊判爲兩途又須濟之以寬俾愚民有自新
之機而良民有更生之樂現在各委員於查圩
一事業已辦有成效即可歸併地方官辦理嗣

後蒙城亳州宿州阜陽四處清查民圩應由各該州縣仿照成法認真經理卽由安徽撫臣英翰隨時具奏以一事權奏入報

聞

二十五日_{丁丑}崇厚奏言接奉

諭旨飭臣將天津所練洋槍隊酌調數百名查拏逆大股旣經渡運竄近山東省城東路黃河之防

最關緊要沿河一帶東省雖有防兵而後路卽
直隸之吳橋景州等處署正定鎮總兵劉景芳
駐紮河閒尙在運河之西而運河東岸吳橋東
光鹽山慶雲似覺空虛臣現在挑選天津大沽
協洋槍隊官兵五百三十餘員名洋礮隊官兵
六十餘員名隨帶礮車六輛備齊軍火派委候
補都司趙起管帶於五月二十六日起程前赴

運河東岸景吳交界駐紮並咨明督臣就近歸
劉景芳統帶遇有緩急由該員調遣以期得力
奏入報

聞

同日丁寶楨奏言臣由夏張督軍前進行至天
平店地方據報捻逆於五月十六七兩日竄近
省城大股屯紮距省四十里之楊家臺等處臣